

四庫全書

集部

欽定四庫全書

集部  
甬上耆舊詩卷二

詳校官右中允<sub>臣</sub>薩敏

主事銜<sub>臣</sub>徐以坤覆勘

總校官庶吉士<sub>臣</sub>朱 銓

校對官學正<sub>臣</sub>常 循

謄錄監生<sub>臣</sub>趙廷璋

欽定四庫全書

集部八

甬上耆舊詩

總集類

提要

臣等謹案甬上耆舊詩三十卷

國朝胡文學輯而其友人李鄴嗣為之敘傳者也文學字道南鄞嗣號景堂俱鄞縣人輯明州詩文者宋有鄞江集已失傳王應麟四明文獻集亦多漏畧至明宋士弘之四明雅集

二十家戴鯨之續集六十家張時徹之四明  
風雅一百二十家于作者採綴稍廣而源流  
未備鄴嗣嘗撰甬上耆舊傳紀其鄉先哲行  
事頗詳文學因即其傳中之人搜錄遺詩論  
定編次而各以原傳系之始自周文種漢大  
黃公終於明季諸家凡四百三十人得詩三  
千餘首本四十卷甫授梓而文學即世其子  
德邁因以前三十卷先刊行之每卷之首俱

有小序畧依其才品名位高下為次使各以類從而不盡以時代為斷于支派極為詳晰中如宋袁爽之絜齋集素甫之蒙齋集亡佚已久今始得于永樂大典中裒集成編文學等固宜目所未睹至樓鑰攻媿全集尚有遺本流傳而僅據其選集鈔存亦為搜羅未至然其體例精審于部居州次之中寓論世知人之義徵文考獻條理秩然固非世之弔名

悅俗瓦礫雜陳者所得而相比矣乾隆四十  
四年三月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

甬上耆舊詩卷一

監察御史胡文學編

吳越春秋稱越地東至於鄞即所謂甬上也自後遷  
置不常一時人物與句章餘姚各相引重今錄其定  
為鄞人者四家以冠此集之首

丈大夫種

字會鄞人

見呂覽  
高氏注

越滅吳其謀居多見越絕諸書既

以伏劍死越人哀之葬于重山一年其神去與子胥  
共出沒江海間晝夜兩至今浙水之潮前揚波者伍  
子胥後重水者大夫種里中王深寧先生論之曰世  
多謂大夫不能從五湖游謂不知幾不知保身義也  
致身亦義也使種蠡俱逝國誰與守且蠡楚人可以  
去越大夫即越人嗷嗷遲遲不忍去父母之邦忠臣  
之志也斯可謂善論古人矣

越王句踐五年入臣于吳羣臣送至浙水之上



臨水祖道大夫種前為祝其辭曰

皇天祐助前沉後揚禍為德根憂為福堂威人者滅服  
從者昌王離牽致其後無殃君臣生離感動上皇衆夫  
悲哀莫不感傷臣請薄脯酒行二觴

大王德壽無疆無極乾坤受靈神祇輔翼我王厚之祉  
祐在側德銷百殃利受其福去彼吳庭來歸越國

越王既滅吳伯諸侯置酒文臺羣臣為樂大夫

種進祝酒其詞曰

皇天助祐我王受福良臣集謀我王之德宗廟輔政鬼神承翼君不忘臣臣盡其力上天蒼蒼不可掩塞觴酒二升萬福無極

我皇仁賢懷道抱德滅讐破吳不忘返國賞無所恡羣邪杜塞君臣同和福壽千億觴酒二升萬歲難極

大里黃先生

鄧人

見會稽典錄

秦博士遭時坑廢儒術因與諸博士東

園公綺里季夏角里先生避世隱於商山漢高帝時

遣人聘之四公不甘仰天歎而作歌謂之采芝歌高  
帝欲廢太子留侯為畫策禮請此四人共輔太子入  
見上四公年俱八十餘鬚眉皓白故謂之四皓太子  
卒得不廢事詳留侯世家後黃公歸老于鄠卒塋大  
隱山亦稱黃墓樂府載琴集曰採芝操四皓所作也  
其詞曰皓天嗟嗟深谷逶迤樹木莫莫高山崔嵬巖  
居穴處以為幄茵曄曄紫芝可以療飢唐虞往矣吾  
當安歸其詞與崔鴻所載不同今並存之

采芝歌

漠漠高山深谷威迤騞騞紫芝可以療飢皇農邈遠余  
將安歸駟馬高蓋其憂甚大富貴而畏人不如貧賤而  
輕世

禮部尚書賀先生知章

字季真行九生小溪之響巖證聖初中進士起羣拔  
類科初授國子四門博士歷遷禮部侍郎兼集賢院  
學士一日併謝時稱兩命之榮又充皇太子侍讀正

授秘書監開元中從封東嶽奏定儀注先生性放曠  
善談笑自號四明狂客又稱秘書外監每醉輒屬詞  
筆不加點俱斐然可觀為學士時每與人燕語好事  
者輒隨筆鈔記俱堪叅詠天寶三載因病疏請度為  
道士放還鄉里上許之仍拜其子典設郎曾為會稽  
郡司馬使得侍養御製詩以寵行皇太子以下咸就  
執別先生歸後築室四明之鹿亭樊榭時往來稽山  
卒年八十六塋于會稽肅宗以侍讀之舊贈禮部尚

書初神龍中先生與越中賀朝萬齊融揚州張若虛  
邢巨湖州包融俱以吳越之士名揚上京人間往往  
傳其文獨先生最貴晚年李杜二公並相推重奉先  
生為宿老此所以名冠一代詞人之首也自後稱四  
明輒曰賀監舊山川蓋詩人名重本朝未有過先生  
者

史家稱唐中葉將相有功帝室惟鄴侯郭汾陽先生  
之識鄴侯李翰林之識郭汾陽此豈當時詩人所能

及耶

開元十三年禪社首山祭地祇樂章

迎神用順和

至哉合柔德萬物資以生常順稱厚載流謙通變盈聖  
心事能察增廣陳厥誠黃祇儉如在泰折俟咸亨

皇帝行用太和

肅我成命於昭黃祇裘冕而祀陟降在斯五音克備八  
變聿施緝熙肆靖厥心匪離

登歌奠玉帛用肅和

黃祇是祇我其夙夜寅畏誠潔匪皇寧舍禮以琮玉薦  
厥茅藉念茲降康胡寧克暇

迎俎用雍和

夙夜宥密不敢寧晏五齊既陳八音在縣絜盛以潔房  
俎斯薦明德惟馨尚茲克徧

皇帝初獻用壽和

惟以明發有懷載殷樂盈而返禮順其禋立清以獻薦



欲是親於穆不已哀對斯臻

皇帝飲福用福和

穆穆天子告成岱宗大裘如濡執珽有顒樂以平志禮  
以和容上帝臨我云胡肅邕

皇帝還宮用太和

昭昭有唐天畀萬國列祖應命四宗順則申錫無彊宗  
我同德曾孫繼緒享神配極

送神用靈具醉

代順和

神具醉杳熙熙靈將往眇惔惔顧明德吐正辭爛遺光  
流禎祺

奉和御製春臺望

青陽布王道玄覽陶真性欣若天下春高逾域中聖神  
臯類觀賞帝里如縣鏡繚繞八川浮宮雘雙闕映曉色  
徧昭陽晴雲卷建章華枝的皪丹青樹顥氣氤氲金玉  
堂尚有靈蛇下廊時還徵瑞寶入陳倉自昔秦奢漢窮  
武後庭萬餘宮百數旗回五丈殿千門連綿南陞出西

垣廣畫螭蛾誇窈窕羅生玳瑁象昆崙乃眷天情興隱  
恤古來土木良非一荆臨章觀趙叢臺何如堯堦將禹  
室層欄窳窳下龍輿清管逶迤半綺疏一聽南風引鸞  
舞長謠北極仰鵷居

望人家桃李花

山原夜雨度仙家朝發東園桃李花桃花紅兮李花白  
照灼城隅復南陌南陌青樓十二重春風桃李為誰容  
棄置千金輕不顧踟躕五馬謝相逢徒言南國容華晚

遂歎西家飄落遠的皪長奉明光殿氤氲半入披香苑  
苑中珍木元自奇黃金作葉白銀枝千年萬歲不凋落  
還將桃李更相宜桃李從來露井傍成蹊結影矜艷陽  
莫道春花不可樹會持仙實獻君王

曉發

江臯聞曙鐘輕棹理還舸海潮夜約約川露晨溶溶始  
見沙上鳥猶埋雲外峯故鄉杳無際明發懷朋從

送人之軍中

常經絕脈塞復見斷腸流送子成今別令人起昔愁隴  
雲晴半雨邊草夏先秋萬里長城寄無貽故國憂

奉和聖製送張說巡邊

荒境盡懷忠梯航已自通九攻雖不戰五月尚持戎遣  
戍徵周牒恢邊重漢功選車命元宰授律取文雄胄出  
天弧上謀成帝幄中詔旂分夏物專討錫唐弓帳宿伊  
川右鉦傳晉苑東饗人藉蕢實樂正理絲桐岐陌涵餘  
雨離川照晚虹恭聞詠方叔千載舞皇風

奉和聖製集賢書院成送張說上集賢學士賜

燕得謨字

西學垂玄覽東堂發聖謨天光燭武殿時宰集鴻都枯  
朽霑皇澤翺飛舞帝梧跡同游汗漫榮是出泥塗三歎  
承湯鼎千歡接舜壺微軀不可答空欲詠依蒲

題袁氏別業

主人不相識偶坐為林泉莫漫愁沽酒囊中自有錢

回鄉偶書

少小離鄉老大回鄉音無改鬢毛衰兒童相見不相識  
笑問客從何處來

離別家鄉歲月多近來人事半銷磨惟有門前鏡湖水  
春風不改舊時波

采蓮曲

稽山罷霧鬱嵯峨鏡水無風也自波莫言春度芳菲盡  
別有中流采芰荷

答朝士

銀鏤銀盤盛蛤蜊鏡湖葦菜亂如絲鄉曲近來佳此味  
遮渠不道是吳兒

咏柳

碧玉妝來一樹高萬條垂下綠絲絛不知細葉誰裁出  
二月春風似剪刀

吳商浩

耆舊詩前三十卷刻成已在校讐萬生允誠趨白余  
曰頃錄四唐人詩及吳商浩僅載其名氏餘不詳至



所錄詩塞上篇末曰分明更想殘宵夢故國依然在  
甬東然則商浩定為甬上人也當附錄賀監後余因  
念宋史藝文志集部有鄞人詩九卷應是宋全盛時  
所輯豈耑錄其本朝人耶抑及唐以前耶但其詩得  
藏諸內府應自足傳而今絕不可得正未知當時所  
列何人所錄何等詩以吾里中先賢而茫茫千年前  
不見作者每念及此輒為廢寢食後錄方外耆舊詩  
至噩夢堂尊者徧覓諸方僅得三首適吾友明介禪

師自吳中來云曾于梵舍值一僧出其橐中詩二冊  
一為吳門釋法杲雪山草一為甬上噩夢堂集且曰  
此法門二寶也可識之介公間為余言余聞之驚喜  
遂屬介公他日若更相值當索鈔夢堂詩而介公云  
亡併為一慟悲矣夫世間有奇文字每苦不得留即  
幸得留天地間而徒一二人愛護亦復何益使論衡  
未傳彼中郎誠非俊物也余故為具述於此倘海內  
學士家有藏宋人選鄧詩九卷及方外諸公收得夢

堂尊者集遙憫求者苦心不惜郵寄以全一方文獻  
當十倍償之他涉甬上詩文有在此集之外者俱同  
前例嗟乎浦江之人物可徵赤城之遺詩不墜故國  
人風愴然夢寐唯藏書家留意焉

塞上即事

身似星流跡似蓬玉關孤望杳濛濛寒沙萬里平鋪月  
曉角一聲高捲風戰士沒邊魂尚哭名王獵處火猶紅  
分明更想殘宵夢故國依然在甬東

長安春贈友人

繁華堪憶帝城春，粉堞青樓勢礙雲。  
花對玉鉤簾外發，歌飄塵土陌邊聞。  
幾多遠客魂空斷，何處王孫酒自醺。  
各有歸程千萬里，東風時節恨離羣。

宿山驛

文戰何堪功未圖，又驅羸馬指天衢。  
露華凝夜渚蓮盡，月彩滿輪山驛孤。  
岐路辛勤終日有，鄉關音信隔年無。  
好同范蠡扁舟興，高挂一帆歸五湖。

北邙山

北邙山草又青青今日銷魂事可明  
綠酒醉來春未歇  
白楊風起柳初晴岡原旋葬松新長  
年代無人闕半平  
堪取金爐九還藥不能隨夢駐浮生

秋塘曉望

鐘盡疎桐散曙鴉故山烟樹隔天涯  
西風一夜秋塘晚  
零落幾多紅藕花

泊月

身逐烟波魂自驚  
木蘭舟上一帆輕  
雲中有寺在何處  
山底宿時聞磬聲

水樓感事

高柳蜚啼雨後秋  
年光空感淚如流  
滿湖菱荇東歸晚  
閒倚南軒盡日愁

甬上耆舊詩卷一

欽定四庫全書

甬上耆舊詩卷二

監察御史胡文學編

甬上文獻至宋而始盛凡中進士者六百九人位至  
執政者十八人今所錄僅二十四家唯樓宣獻公得  
其選集薛氏有世編故錄之為詳餘俱從諸舊乘陳  
言腐什中節取一二而已其全集俱苦覓未見至如  
鄞江王先生致桃源王先生說城南樓先生郁正獻

袁先生燮此所謂郡中九先生其四出於鄞者也他  
文學名臣若學士豐清敏公稷正言陳文介公禾侍  
御林公保司業高憲敏公閱學士陳公顯御史黃公  
龜年僕射魏文節公杞學士汪莊靖公大猷侍制趙  
公粹中學士陳文懿公居仁越公袁公韶太常臧先  
生格直閣樓先生昉太常陳文定公槩少傳趙清敏  
公與權司業陳公塤直閣史公彌翠學士張公即之  
直閣王公搆侍講趙公逢龍博士陳先生著教授史



果齋先生蒙卿諸公則併單章一律亦不可得見矣  
此吾黨今日所以彷徨太息唯恐采錄之後時也茲  
特列其名氏附于二十四家後倘有藏書故家能收  
其遺集當更力購之錄遺補亡尚有待焉

中大夫周公鏐

字廉秀銀青光祿大夫師厚長子也生有異稟十歲  
如成人十四入太學力學勤苦登元豐二年進士初  
調桐城尉愾然曰古人學優乃仕吾昔所治科舉耳

遂辭不赴官益精研六籍及諸子百氏書盡著論其  
本旨為文踔厲競爽追古作者不以雕飾字句為工  
務期于有用旁至占緯相地家言靡不該博嘗遊潁  
昌訪其舅氏范忠宣公時文潞公司馬溫公富韓公  
俱在數得造請問益其學逾進至京師上書言事同  
里國子祭酒豐稷給事中范祖禹交薦之出知南雄  
復以言邊事忤時相名入黨籍因退居西湖作四休  
堂與弟承奉銖籃輿野榜徜徉山水間風格宛如晉

人間為詩以自娛客至具肴簋隨其所有終日談論  
古今未嘗及官事紹興元年轉中大夫朝廷方用之  
而公老矣卒年七十五所著文集二十卷承宣集一  
卷明天集六甲奇書各一卷尚書右丞胡公宗愈翰  
林學士王公覲並重其才識相繼以女妻之蔡京作  
黨人碑舅甥翁壻俱在籍中後人以為盛事焉

佛跡巖

靈山名大蓬香水靄蒼蘊龍祇久覆護雲物翳深谷拂

衣向剗中神斧斷蒼玉至今天人尊靈跡印金粟頗聞  
開士識飛錫隱巖麓坐令湖海間香貢走川陸巍巍虔  
報地色相儼金屋緬想舊巾瓶猶能慰心目籃輿訪蓮  
社一笑欣自足撫事動幽尋疇能念榮辱松爐裊如見  
餘力付棋局更覺夢中身儵然百無欲

題金氏萬金樓

幾年江上夢黃鶴意悠悠百尺獨臨水萬金難買秋杵  
聲喧藥市欄影浸漁舟應有湖中客分身向此游

澄輝閣

雄建俯空濶下瞻霄漢浮眼將雲漠漠心寄水悠悠日  
暖鳥飛鏡月涼魚弄鉤行期分此景家在甬西頭

和郡守彭吏部西湖

使君脩禊與民游千里笙歌水面浮動地風從雲外起  
截天霓向雨中收登臺已有難并樂擊壤能無寡和憂  
却憶內家新賜火海棠無數出牆頭

牛鞭初動轉新鶯夢覺池塘選勝行水鑑光中千騎合

山屏影裏萬艘橫雲從布穀原頭過雨向催詩筆下生  
藻繪昇平知有待閣梅先已入調羹

薛處士唐

失其字隱居不出所著田間集一卷後贈朝議大夫

田舍作

世業存五畝家風守二南適情無過睡幽事不妨貪  
老厨增肉朋來樹選柑每慙躬稼穡未及野農諳

秋眠

涼色正堪弄新礪絕可憐况蕪梧葉響槭槭到牀邊  
雁叫遠渚孤雲停莫天郊居迎送寡秋日足高眠

書壁

自甘藜藿不求魚大笑馮生出想車才子座中悲鄴下  
高篇社裏厭黃初不臣未遂忠君志生子猶能讀父書  
酒後放言揮秃管元龍豪氣本難除

直閣王公廷秀

字穎彥由慈徙居鄞初入太學與龜山楊先生游其

學上迷旁搜不屑趨時好復學詩于黃太史庭堅文  
詞卓犖登政和上舍歷官州縣以侍御史李光薦改  
御史臺檢法官宣和靖康朝進言忠懇張邦昌僭號  
獨公執節不屈後御史中丞上其事拜監察御史奏  
乞威斷出于人主所遣宣諭官當令兼舉廉吏又言  
刑名有疑慮者州郡法官應具申憲司閱實取裁遷  
殿中侍御史臺綱益肅論黃潛善為相時恃寵賣官  
潛善責授秘書少監明受之變與鄭毅力爭不宜去



帝號事遂止復論呂頤浩奏擬不當出知筠州右正  
言呂祉奏上以論大臣罷一言官即明日大臣有失  
誰敢復言者遂召入為吏部郎改左司言朝廷比來  
深疾貪吏然州縣中豈無介操自將久屈下僚者宜  
命五使所至以廉潔清修可表率吏士者具上其名  
更叅諸公議不次遷擢以勵士風從之進檢正中書  
門下省諸房公事與宰相議多不合力引疾求去詔  
直秘閣主管崇道觀歸所著有航海記磨衲集

同舍弟泛舟西湖登畫錦堂步至紫翠亭望懶  
堂景物懷故龍圖舒先生

城中十頃湖雲水相演漾春風破冰谷拍岸新流漲平  
鋪鴨頭綠澹沲蒲萄釀朱費媚孤嶼梵宇麗相向萬瓦  
生新暉千花聯錦帳晨曦照炯炯芳氣浮泱泱日暮姿  
態妍烟霞渺空曠誰將水仙鏡聊借詩人仗卧護五羊  
城追懷老詩將微吟示清野麀戰得閒放變化無端倪  
虛無落名狀坐令湖上景勝絕神宇王當時經行地藻

麗隨屨杖斯人今則亡物色亦摧喪他年牛馬走曾拜  
丈人行塵埃久飄泊歲月成漫浪問訊懶堂居松竹欣  
無恙尚意壁間聲時賡朱絲唱撫事重興嗟陳迹徒悵  
望哦公十洲詩風月為悵悵

少卿汪公思溫

字汝直大父元吉以縣從事為范文正公所知王荆  
公來鄞亦稱為庶平吏父洙以春秋教授里中人稱  
曰汪先生公登莫儔榜進士授雄州教授調餘姚令

築堤浚湖吏民愛信之欽宗以諸王就傳擇除贊讀  
公與弟思齊並命除吏部員外郎出守三衢有自稱  
祁王過郡府吏請避正堂以舍公微察其偽不許已  
而其人果敗御史中丞徐俯入朝道由郡公以部使  
者禮見不為設厨傳俯憾之劾以他罪中丞辛炳為  
疏辯得白遷司農大府少卿知臨安府淞河以漁舟  
濟人每中流故弭楫索客多出錢或風暴至舟輒覆  
善汨者競取其錢物登岸公悉捕繫以殺人罪論更

作大艦載客餘盡禁之相秦檜以故人屬薦公謝曰  
使其可薦誠不待相公諭如不才即相公言無益也  
有旨營政府檜欲以相府儀制稍異執政府公益持  
不可檜積怒罷直顯謨閣食祠祿凡十八年卒年八  
十有一

三江亭和郡守韻

危亭聳觀與雲侵勝槩何勞杖履尋回合江山真有意  
去來鷗鷺本無心歡聲洋溢均千里好句清新抵萬金

四海正需經濟手豈容長對白頭吟

知衡州軍薛公朋龜

字彥益政和八年進士授仙居縣尉值歲飢道殣相望剽掠者四起公請于郡發廩粟賑民解散盜賊境內悉平改楚州司錄適靖康之變楚師勤王者歸道州境郡守薄其供一軍盡譁公馳往諭以國法立發帑犒之軍始定已擢為奉議郎去官民遮道泣曰我輩已為俎上肉藉使君活我至馬首不得行監司上

其狀再擢監行在登聞檢院兼權工部郎中守直不  
阿所彈劾使權貴斂手以左朝奉大夫出知衡州致  
仕在里門與汪汝直諸公結社林下後輩多從杖屨  
相造請時稱為四明五老焉所著彥益先生集二十  
卷子孫世有賢者

自南宋以來氏族之盛莫過於吾郡而鄞又甲于他  
縣一時推史鄭樓豐四大家而薛氏以義門瑞室共  
推顏柳遂得相頡頏讀世風一編列詩家二十六人

亦可見其盛矣

岱嶽篇雪中送華山人東遊

七十二君已綿邈乾坤只今留岱嶽烟書雲篆弔秦碑  
萬聖千靈朝漢朔白日雕旂路相望夜深仙樂張天上  
日觀天門踴躍登芒作雙鞵藜作杖匹練吳門見幾人  
向來寂寞空山春溪花谷樹忽生色一朝若為山人新  
君行正直年華謝山雪紛紛向君下去看九州玉削成  
孤高始信岱嶽名若趁長風竟飛舉鵞毛柳絮同身輕



江船

夜色千山白扁舟獨進遲鄉心共帆急世路與波隨  
性野禽魚習官寒故舊知江梅如愛客早放歲寒枝

露

乘興訪村家微微見露華暗滋三徑草晴濺一庭花  
夢入關河濕涼生更漏賒清江千萬里何處點蕉葭

見雁

寒衣九月授他鄉遂見征鴻序一行秋色未深先避雪

邊聲忽到又隨霜曾愁天路雁繒繳只想中原食稻粱  
漢使不歸書不繫至今塞有客沾裳

剡中別吳客

百道飛流向剡飛高田不歟下田肥吳人只道吳山好  
黃獨如拳也救飢

安撫王公伯庠

失其字登紹興二年進士試教官第一歷遷殿中侍  
御史出為夔路安撫使公性博記過人夔地絕遠為

手圖其險要所部俱不能欺巴俗多掠子女出境公  
特嚴其禁遂莫敢犯所著有歷山集雲安集宏詞集  
要變路圖經諸書

三江亭和郡守韻

使君不受二毛侵杖屨逍遙得勝尋撥遣簿書聊永日  
登臨山水一何心殘梅墜雪垂垂白弱柳搖風淡淡金  
倚矚大江供一笑幾多襦袴在謳吟

直閣薛公居實

字去華知衡州朋龜之子也歷官守莆陽更起學宮  
遷提舉福建路常平茶鹽值歲飢救荒有績所在俱  
以治行稱自祠宮召對除倉部員外郎陞郎中再擢  
淮東安撫使直秘閣卒于揚州所著有薛安撫集十  
五卷

故舊相送出城門

策馬國門南行役感時節唧唧寒蟬亂皎皎層巒潔脩  
途遵廣川哀林夕陽滅含情不忍語眷舊詎忍別抱疴

謝綬冕寄情應巖穴樹臨越海潮山背是閑雪各勉疇昔  
心音書戒遼絕倘訊幽栖子杜關理丹訣

皇太后輓歌

夾日光先紫寒星聚夜臺慈名千古重哀詔九天來地  
底鷄人少雲中鶴使催宮門芳草遍從此不須開

秋日看雲

曉雨沾山路秋雲看野亭薄從川上起低向屋邊停合  
處山林白消來天地青人生無定迹不止是浮萍

老妓自稱汴京宮人泣而贈之

薄粧自叙老深宮一曲悲歌聽不終  
黑髮尚霑梁苑雪素衣還帶上林風  
殘春柳葉蕭條綠破國桃花冷落紅  
收拾琵琶蹙眉黛教人同在淚痕中

薛知縣靖

失其字紹興二年進士官某縣令所著有南枝集十  
卷南枝續集八卷

歲久旱喜雨

東南苦亢陽吳越重罹厄流徙罄村墟入夏地尚赤詎  
無溝中人矧乃急往役賴茲天心慈弗終閔膏澤凱風  
將雨至蓬蓬亘昕夕水勢千澗呼雲陰四郊積祁祁沾  
洒均歡聲遍南陌秋秧布有種萬一償春麥相率理長  
鑣幸可謀擔石我亦歌豳風憂心庶幾釋

望金山用唐人韻

一柱支空立濤聲春寺聞消來巴地雪飛到潤州雲寂  
寞江山色縱橫盜賊羣不堪形勝裏北望涕紛紜

薛郎中揚祖

字元祖歷官知漳州以治行召為大理丞漳舊有土城高僅五尺公至京師以脩築請于朝遂詔守臣趙汝讜經畫如其言漳人賴之遷刑部郎中以疾請外得池州所著有閩志編三卷

與張樞密話舊作

羸軀苦善病日與藥裹親藉彼參苓功扶此憂患身思君若飢渴相憐同病人余身本蒲柳寧埃秋風晨君誠



松柏姿何患不長春容面一若丹鬢髮一若銀來日安  
可期往事曷足陳不能罄君壘奚以浣我塵吹笙將鼓  
瑟慚余非嘉賓

郊居寫志

過庭聞曲禮在野習王風世亂思休否兒愚藉發蒙雲  
霞海色裏烟火雨聲中所喜田間事比隣自昔同

送表弟朱拙夫以縣尉赴新安

散金結客不求償落落生平此熱腸七尺許君何慷慨

一朝用世果循良滿城山色侵官舍徧地溪聲度女牆  
邑長若逢潘岳輩肯教名獨起河陽

薛循祖

失其字官掌機宜文字所著有映音一卷

秋園詠物詩

怪爾知時節逢時輒自鳴空堦一夜響短榻幾人驚唧  
唧催寒色蕭蕭助葉聲無人悲物意徒語不堪情

蟋蟀

風急翅紛紛遙空自作羣到來秋塞月鳴入暮江雲亂

起千行字俱飛一片文高樓有思婦嘹唳豈堪聞

雁

題采藥圖

江上奇峯雨後多千層飛瀑灑青蘿扶筇亦覺溪橋滑  
尚有幽人採藥過

少師資政殿大學士樓宣獻公鑰

字大防大理評事郁之五世孫也隆興初進士中教  
官科調温州教授會剛定淳熙法議者欲降太學釋  
奠為中祀公曰乘輿臨幸于先聖則拜武成則肅揖

其禮異矣豈得鈞體乎適用薦遷太常博士時閩蜀士大夫各植黨公入對歷言東漢黨錮唐朋黨元祐黨籍之弊孝宗曰唐人主謂去朝廷朋黨難朕嘗笑之此特主聽不聽耳再遷宗正丞出知温州光宗嗣位召對奏曰人主初政當先立其大者至大莫如恢復然當先強主志進君德今日網密甚矣望陛下軫念元元以設禁為不得已凡創意增益者寢而勿行以保養元氣除考功郎兼禮部時吏銓並緣為姦多

所壅底公盡草去之擢起居郎兼中書舍人公立螭  
頭登左掖繳奏無所回避禁中或有私請上曰樓舍  
人朕亦憚之不如且已會慶節上壽扈從班集乘輿  
未出已而玉牒聖政會要書成將進重華又屢更日  
公言臣屢歲隨班見陛下上壽重華宮歡動宸極嘉  
王日趨朝謁恪勤不懈竊料壽皇望陛下之來亦猶  
此也又言聖政之書載壽皇一朝之事玉牒會要足  
成淳熙末年之書幸速定其日無復再展以全聖孝

于是上感悟進書成禮試中書舍人兼直學士院光  
宗病不能持喪傳位皇太子公草詔有曰雖喪紀自  
行於宮中然禮文難示於天下人服其婉寧宗既受  
禪遷給事中公兼掌內外制論正太祖東向之位朱  
熹為侍講以言事除職與郡公言熹始除宮祠深駭  
視聽今復除職是聖意不在熹也熹大儒碩學難進  
易退陛下閱其耆老當此隆寒立講不便且俾內祠  
脩史少俟春和復還經筵庶君臣之義備不報時韓

侂冑用事日貴臺臣希旨論趙汝愚言定鼎乘龍之夢語涉不道公曰嘗聞汝愚言夢先帝賜以金湯壺即謂之定鼎可乎又嘗夢朝會見白龍升天未幾上袞服嗣位即謂之乘龍可乎吏部侍郎彭龜年入內殿力言侂冑擅權漸不可制上大怒黜龜年外除侂冑與祠公與林大中疏言嘉邸舊臣惟龜年尚在不宜使出乞留侍講筵與侂冑一外祠龜年竟去公遂出外尋復奪職告老家居凡十三年杜門著書侂冑

嘗與客言樓大防善士何無一札入都門且使諭意  
客至公家述其語公默然子弟相顧輒索具紙筆公  
從庋中取顏氏家訓言士大夫晚歲名節事置紙上  
即起入內客疑公援某事取視之俱大愧撤去紙墨  
公湏臾就坐客不敢言公亦不復問舉酒言笑如平  
時其從容持正若此侂冑誅起公翰林學士遷吏部  
尚書兼侍講適趙汝愚子崇憲奏雪父冤公乞正趙  
師召之罪重蔡璉之誅毀龔頤正續稽古錄以白誣



謗公年過七十精敏絕人每詞頭下立進草院吏驚  
詫歷遷同知樞密院叅知政事力以年乞身進資政  
殿大學士歸卒於家贈少師謚宣獻公學問精博中  
原師友源本悉窮其淵奧經訓小學並精据可傳信  
初罷官里居聚書東樓踰萬卷皆手讎校稱善本性  
尤樂易客有願鈔其書輒欣然啓帙以授初定注春  
秋未脫藁及在永嘉見陳傅良書已成即焚已草特  
為叙其書嘗薦真德秀掌內制德秀每言得與樓公

清言竟日或極論徹旦退而書紳不為塗人之歸皆  
公教也公扁所居曰玫瑰齋自稱玫瑰主人有文集  
一百二十卷行世

求仲抑招遊山歸途遇雨

竹輿遶湖濱宿霧尚厭浥徑到玉岑下坐久客始集起  
穿靈石山萬松介而立梅天氣清潤空翠行可挹古藤  
幾百年枝蔓兩山及見說暮春時花紫紅熠熠直疑老  
潛虬初起夜來蟄俯玩歲寒泉齒冷不敢吸相將上龍

泓塵鞅謝羈弔洞有靈獸居臨深心岌岌魚遊明鏡中  
巨浪無三級寒苔載水去萬頃潤原隰濛濛山雨來歸  
僕飛鳥急野興殊未已日昃不暇給衝泥上湖船雨陣  
遽奔襲飄風將急點回旋驚四入中流蓋蕩兀短篷不  
當笠停篙亦久之怒勢不少戢我徒方嘯歌弗為改豪  
習但恥餅壘罄莫問衣裳濕

題孟東野聽琴圖因次其韻

誰與住前溪夜深幽琴鳴天高衆氣肅月斜映疎星椽

林助蕭瑟泉聲激琮琤彈者人定佳能使東野聽東帶不  
立朝遙夜甘空庭龍眠發妙思神交窮杳冥不見彈琴  
人畫出琴外聲郊寒凜如對作詩太瘦生恨不從之游  
撫卷空含情

王成之給事圓山堂

烟雨望麗陽前山羅紫翠照水挹南明不與巾子對  
來登圓山一覽萬山會蓮城山固多此地要稱最主人  
意軒豁物景供曠快山椒湧華屋迴出風埃外一物無

遁形所在見纖芥清霜肅天壤佳樹隔闌闔俯仰隨取  
舍左右從盼睠門墻尋故步杖屨許從邁恍然至絕頂  
更覺宇宙大樽酒屢勸酬棋枰更勝敗秋高月色皎浮  
雲了無礙不俟攀仙掌徒手吸溪瀨茲堂極崇敞意若  
欠深邃先植易生木徐待松栢兄望遠仍可喜意滿聊  
自晦無使山下人或得窺外內但恐趣賜環樹藝或不  
逮先生味斯言一笑相領解吾將飭園丁隨處添翳薈  
他時遶扶疎吾廬益可愛

題范寬秋山小景

山高最難圖意足不在大尺楮渺千里長江浸橫翠人  
家雜烟樹愴恍徒意會苟或森三尺便若俗子對此畫  
格律嚴興寄獨超邁洗眼映牕明妙處乃不昧流泉見  
原委著屋分向背推車度危橋指路向關隘輕舟最渺  
茫浦嶼如有待山稜瘦露骨汀洲橫若帶木葉黃欲脫  
秋容儼然在霜餘無片雲歷歷數沙界搜尋目力疲欲  
賦無可奈近山才四寸萬象紛納芥欲識無窮意聳秀

更天外

送從弟叔韶尉東陽

阿連少也爽孤立生氣燄壯年淬詞鋒傾心事鉛槧膠  
庠困蘼鹽世科終穩占再興聯桂堂爾祖真不忝況將  
尉東白士友尚歆豔惟我愛子深老矣猶不厭固知為  
子喜頗亦動吾念贈子當以言苦口當鍼砭此邑子舊  
遊歷歷數行店棠陰見郎君遺老喜窺覘其民最服義  
情偽靡容拚莫恃采棒威要使慕巾墊子文多立就詞

采更華瞻吾聞恃俊者塞門差反玷前賢最加謹臨用  
更重檢他時可待取天庭得錦帙吾家有素風耳目久  
濡染毋庸慕豪舉助廉先以儉酒酒更宜戒平地有深  
塹酣暢當以時勿習盃瀕豔將論毋過高斯言却防玷  
立節毋務奇躡等恐成僭外物思過分檢身但多欠勿  
嫌一尉卑封清尚為儻仕途固嶮巖大要進以漸不須  
苦求知真知奏應剡向來湖海豪四十可收斂寧為處囊  
錐莫作露卼劒匆匆摻袪別魚鮮酒方釀刮目待子歸



罔俾吾言驗

送元衛弟赴長亭鹽場

阿連生向秀二親所甚愛仲兄勤撫養遇事輒加誨幹  
蠱靜而辦曾次無卑隘今焉職牢盆官宇臨渤澥母謂  
官為小要使所居大毋言才可了檢身到纖芥門戶重  
衣冠家風繇數代當以誠心求子親勿自懈亭民亦良  
民孰謂居無賴官吏既擾之兼并責逋債熬波亦良苦  
樂歲色猶菜輸鹽不得錢何以禁私賣所在積蠹久良

法浸多壞吾間不無術更當審利害熟視不為謀空餐  
愧難蓋不應行一切遽使絕稱貸富者能寡取倍息久  
仍在貧者庶少寬公私可緩帶母年登九十家居幸康  
泰其家不從政禮經有明戒幸子去不遠時時可歸拜  
小別不足惜輕裘送前邁

次韻翁處度同遊北山

兩夫持鋤行我先巧尋徑路其智專我扶枯藤衣短後  
意氣已出層峯顛何郎鮑叔鮑經歷勝處一手自編

我攜舊記訪陳迹正恐急景不得延何當共登青雲梯  
今日邀我共擊鮮始觀神龜闖青泚上有石壁來飛泉  
隱青遺基不可坐下顧亂石如磨鋌懸崖雙瀑灑空雪  
來自一握孤雲天却從下流汭深險崎嶇直到清潭邊  
朝陽射光破幽閤斷虹上下遮潺湲傳聞高山更高處  
雅有行路從西偏同行無乃深好事盃酒自攜脚力全  
誅鉏荆棘從鳥道欲進不得意愈堅旋呼童僕累危石  
笑採野菊聊盤旋捫蘿騰身上苔磴往往歡呼爭著鞭

側行危步汗浹背石角或使衣裳褰少焉身在雙瀑上  
又見高派衝泓淵自笑泉石成膏肓愛賞不減蟻慕羶  
巉巖數峯巧遮護妙處二老初無傳脫迹塵埃到此地  
便覺神思飄飄然回首江南塵一聚城郭歷歷眼欲穿  
相期更看流水處步履未倦夸輕翩一上千尺窮山椒  
碧澗靡迤流蒼烟尋源不能且望返石猊巍距驚神鑄  
退求歸逕惘難問藤蘿所在相縈纏我方跼蹐風煙表  
披披衣袂身欲仙晚歸招提各痛飲讀盡屋壁長短篇

截筒環山覽清駛竅出珠穗心亦憐碁枰相與論瓜葛  
橫琴不妨揮五絃人生易老費扶掖勝具大率須少年  
伊余歷騁佳山水愛奇竊慕太史遷明年炎暑襲故步  
與君共枕清流眠

題高麗行看子

高麗賈人有以韓幹馬十二匹質于鄉人者題曰行  
看子接處黃綾上書韓幹馬表飾以綾尾以精紙皆  
麗物也聞其懷金來取因命工臨寫而歸之再用東

坡韻書臨本之後

竹披雙耳風入蹄霜鬣剪作三花齊  
相隨西去皆良種撼首勢竄迎風嘶  
丹青不減陸與顧麗人傳來驛通語  
裝為橫軸看且行云是韓幹非虛聲  
圉人乘馬如乘鶴人馬相諳同呼啄  
中有二匹真游龍爬梳迥立綠揚風  
賈胡攜金贖此馬亟呼工人臨舊畫  
我詩無意到三韓寫向新圖時自看

再題行看子

先引護欄毬子驄九馬近遠俱相從黑駒騶黃騅素騮  
亦有當面仍銀駿夏國一種青于藍五明錯靴皆如龍  
或驂或引恣馳驟坐覺隱耳聲瓏瓏人間安得有此輩  
一一必自天閑中不惟骨相異凡馬圍人貴介多雍容  
三花剪鬣自官樣空鞍更以香羅幪中間二者蓋天馬  
齒雖已老氣尚雄不知幾出橫門道雙立柳下青陰濃  
擡韁猝領刷背膂旋梳駿尾搖清風人人生意馬欲動  
態度曲盡各不同韓生去我幾百年藻色尚濕青與紅

不知何時墮雞林萬里遠在東海東賈人攜來得寓目  
一見絕歎丹青工千金可買真不惜忽復攜去何匆匆  
急令臨寫得形似如此神駿那得逢開元內外馬盈億  
色別為羣從登封韓生所見定傑出七尺為駉八尺駮  
向來鶯邊繫金絨歸乘欸段頭已童伏櫪寧能志千里  
却笑區區據鞍矍矍翁

次韻趙子野石城釣月圖

石城江頭可憐月曾照六朝清夜獵古往今來知幾何



長江滾滾蕭蕭葉謫仙去後詩盟寒三孫詩瘦清欒欒  
詩情浩蕩坐無奈扁舟笑把磻溪竿江平風輕波瑟瑟  
宿靄卷空天一色東風吹句入長安一卷風流座中得  
初讀神意清再讀曾次平回頭明月祇如故世上廢興  
徒紛更想君一葉方掀舞夜靜水寒誰與語船頭有酒  
且孤斟莫向金陵重懷古

它山堰

它山堰頭足奇觀百萬雷霆聲不斷誰把并州快剪刀

平剪波濤成兩段四明山深水源遠衆壑會溪長漫汗  
滔天狂潦不少留瀉入長江勢奔竄賢哉唐家王長官  
欲圖永利輸長算想得慘淡經營時下上山川應飽看  
西偏千嶺相屬聯惟有茲山擁東岸遂于此地築橫隄  
截取衆流心自斷斟酌利害不全取高下參差僅強半  
水大十分七入江徐挹三分供溉灌支流瀾瀾穿郡城  
脈絡貫通平且緩旱時反此水亦足坐使千年忘旱暵  
無窮廟祀報元功像設森嚴人敢玩梅梁天矯有冥助

大患於今尚能捍前輩所作多神靈日月真成赤心貫  
後人小智枉更易仰望先賢重興歎老木號風波湛碧  
畫屏俯仰丹書煥更須積雨看驚湍濡足褰裳何足憚  
去家不遠時一遊短艇垂綸流可亂八月倘有仙槎來  
便欲乘之泝天漢

湖亭觀競渡

涵虛歌舞擁鄴君兩兩龍舟來往頻閏月風光三月景二  
分烟水八分人錦標贏得千人笑畫鼓敲殘一半春薄

暮遊船分散去尚餘簫管遶湖濱

海潮圖

錢塘佳月照青霄壯觀仍看半夜潮每恨形容無健筆  
誰知收拾在生綃蕩搖直恐三山沒咫尺真成萬里遙  
金闕峇堯天尺五海王自合日來朝

行香聞杜鵑

牆西綠柳杜鵑聲老我何堪側耳聽我自賦歸歸不得  
不須苦語更丁寧

小谿道中二絕

簇簇蒼山隱夕暉  
途看野雁著行歸  
久之不動方知是  
一搭碎雲寒不飛

後衙環村儘溯游  
鳳山寺下換輕舟  
舟人努力雙篙急  
引得清溪逆岸流

過從子澤家

楚楚初篁脫綠苞  
城居約畧似荒郊  
土膏更得春風力  
直引薔薇上竹梢

監庫張先生良臣

字武子一字漢卿家洪州父避地來鄞遂家焉先生少善為詩高潔清厲能擺落凡俗音節磊落讀者悲壯尤長於唐人絕句語盡而意益遠論者謂詩至盛唐極矣杜牧之李商隱晚出以絕句為專門至宋王安石力倣之然終不能似黃庭堅以造句為工律呂乖忤而詩益變陳與義多援古語不牽引事物似黃而益奇詩之變無餘蘊矣風雅道衰獨先生徹幽內

明復唐聲律一時江南詩家共推為過江詩祖以至  
方外諸禪人吟誦其體競相宗尚而詩稍復其變焉  
先生于舉子業非所長隆興元年試南省同里魏丈  
節杞時為參詳攜三策以見知舉張燾曰此文拙古  
必故人張武子所作公欲得士願以進燾許之撤卷  
果先生也先生官止監左藏庫輒罷歸魏丈節晚居  
小溪山中先生時從倡酬其詩或終歲不出一語有  
集十卷至咸淳間甥徐直諒始哀刻於廣信郡

先生詩時謂其一變宋音復還唐雅至推為過江詩  
祖正不僅甬上眉目已也而其詩刻於江右吾鄉傳  
者絕少嘗與黃梨洲先生共相嗟歎黃先生云西湖  
志中刻有絕句一首即秉燭徧繙得之始服其絕句  
之妙嗟夫先輩遺文使後人不能盡讀誠一恨事也

過清脩巖

膽失巖上人心怖巖下人履道自坦坦何在不問津人  
生貴得意毋容矯吾真淵明兀餘年漉酒乃一巾



南渡曉行

七點五點星斗落一聲兩聲鐘磬清  
路入小橋和夢過  
埜花深處草蟲鳴

西湖

帖帖平湖印晚天  
蹋歌遊賞錦相牽  
都城半掩人爭路  
猶有胡琴落後船

高萬竹先生元之

字端叔武烈王瓊之七世孫也  
建炎間衣冠南渡因

定家於鄞家貧無書得易編口誦不輟數月忘盥櫛  
隣生有書深憐之稍借以觀後受易春秋學于沙隨  
程迥時傳伯成為郡教授少所許可獨折節與先生  
交由是鄉學者數百人俱師事先生嘗作變離騷九  
篇曰愍畸志曰臣薄才曰惜來日曰感回波曰力陳  
曰危衷曰悲蟬蛸曰古誦曰繹思行于世宋人擬騷  
俱莫能及也集春秋說三百餘家號義宗悉本經旨  
凡百五十七卷易詩論語後漢歷志解各一卷詩三

千襍著五百號茶甘甲乙集先生事親孝貧能輕財  
復喜言兵事凡陰陽方技九流諸書盡能究其指歸  
五上禮部卒不第而及門多至顯官將死手屬書樓  
宣獻公以歐陽公南省白欄求志文貧不能葬門人  
會墓于桃源鄉蔣山買田立祠于寶巖院歲時祀之  
稱曰萬竹先生

大小晦山

大晦出小晦過盡山峯翠寒雲抱幽石枯卉老孺瀨沿

流逕偏側當道屋破碎却立重回首瀑布瀉雲背

飛雪亭

危亭上拂烟霞光蒼崖深倒蛟螭穴天河飛來破山翠  
寒入疎林風自發翻珠錯玉無時歇岩前散作千秋雪  
寒聲蕭蕭凜毛髮白雲片片翔空滅飛流濺珠入毫端  
天然一詩為題絕

長汀即事

楊花剩得晴方好榆莢其如世上貧花向喜中看更好

分明春色解欺人

薛進士澄

乾道二年進士所著有家塾自藏六卷

效朱公叔絕交詩

東山有梟不祥其名惡木是息惡聲是鳴食不棄腐飲  
不擇清宜飛求伏以晦為明凶殘滿志嗜欲惟撓伸頸  
招鳳使鳳自驚豈有鳳口而和梟聲奈何伊人弗審物  
情請從此別各自謀生

賦得一年將盡夜

可惜惟茲夕須臾即舊年人間歲窮處客館夜分邊應  
逐銀缸謝聊憑玉漏延曉風雖未至殘臘幾時天

立夏

漸覺風光燠徐看樹色稠蠶新教織綺貂敝豈辭裘酷  
有烟波好將圖荷芰遊田間讀書處新笋萬竿抽

高處州似孫

翰林學士文虎之子也為禮部郎守處州所著有緯

畧騷畧等書

石橋

一石上負昆侖柱一水西奔牛女渚  
玉榦擗鱗萬松古夜夜神光干帝宇  
石滑苔危水一縷四海長依開闢雨  
月落未落半規吐雨足敲泉龍擺舞

蔡山渡

江上人家破竹門潮來水長浸籬根  
紫魚一尺枇杷小放溜船來酒滿尊

薛縣尉師點

嘉定元年進士官某縣尉所著有從政工餘二卷

酌會張安撫伯玉先生

寡交率天性積疴攻妙藥干祿念丞嘗著書恣談詭永  
矢離畏途何況縻好爵感子故人意屏吏延鈴閣時剖  
千秋心兼訂三山約風流張平子文采謝康樂潛魚媚  
幽潭高鳥昵林薄物類既參差天地亦寥廓但愁霜霰  
多石出兼水落



少傅通奉大夫袁正肅公甫

字廣微正獻公燮之三子也嘉定七年進士第一授  
秘書省正字上殿劄子言賢才用舍可懼民生安危  
可懼衆情閉塞可懼羣情逸豫可懼乾斷不行可懼  
辭甚愷切遷校書郎轉對言邊事之病不在外而在  
內偷安之根不去規模終不立壅蔽之根不去血脈  
終不通忌嫉之根不去將帥終不可擇欺誑之根不  
去兵財終不可治祖宗之御天下政事雖委中書然

必擇風采著聞者為臺諫敢於論駁者為給舍所以  
戢官邪肅朝綱也今日誠體是意以行之可無偷安  
壅閉者矣出通判湖州增積貯核隱產增附嬰兒局  
再遷著作佐郎知徽州治先教化崇學校訪便民事  
上之蓄常平義倉備荒興脩陂塘剏築百梁遭父憂  
服除知衢州立旬講歲撥助養士千緡郡有義莊買  
良田二百畝益之提舉江東常平適歲旱給發庫庾  
遣官分行賑濟醫療又告于朝給度牒百道助費提

點本路刑獄兼提舉移司番陽時霜殺桑諸郡被水  
連請于朝給度牒二百道賑恤之都城大火上封事  
言上下不交以言為諱天意人心實同一機願下哀  
痛之詔以回天意詔求直言復上疏言災起都邑天  
意蓋欲陛下因其所可見察其所不可見大行黜陟  
與天下更始行部問民疾苦薦循良劾去墨吏決滯  
獄所至詣學宮講說復取孝經衍其義告于屬邑立  
書院於貴溪之南祠陸象山身講授學者歲大旱請

于朝得度牒緡錢綾紙以助賑恤疫癘大作勅藥院療之前後持節江東五年所活無算諸郡德之俱為生立祠轉將作監領事如故彗星見詔求直言上疏言皇天震怒由貪冒成風致愁苦之民衆願一變上下交征之習帝親政以直徽猷閣知建寧府明年轉福建轉運判官閩鹽隸漕司綱運供費增益無紀又丁米錢久為漳泉興化民患公皆奏捐之遷秘書少監入見帝曰卿久勞於外篤意愛民每覽所陳備見

懇惻公奏陳無逸之義且請力守更化以來求賢如  
不及之初意遷起居舍人兼崇政殿說書于經筵奏  
剛之一言最切於陛下陛下徒有慕漢宣吏治之名  
乃更墮元帝太宗柔弱不振之失總由不識剛德之  
真所謂真剛者當為必行不當為則斷在勿行又乞  
專意經訓養育精神務令充實上與天一下合人心  
今上意欲全功臣之世詔自今中外臣僚奏事毋得  
擣撫以奏是消天下讜言之氣其謂陛下何兼中書

舍人時相鄭清之以國用不足履畝使輸券公奏避  
貴虐賤有力者頑未應令而追呼迫促家業破盪者  
率皆中下之戶乞加哀恤嘗講罷帝問近事公奏惟  
履畝事人心最不悅適講漢高入關辭秦民牛酒民  
俱大悅今日橫科若此民心喜乎怒乎本朝立國以  
仁陛下為此舉仁乎否乎帝為惻然時朝廷以變事  
為憂史嵩之帥江西力主和議公奏曰臣與嵩之居  
同里未嘗相知而嵩之父彌忠則與臣有故嵩之易

于主和彌忠每戒其輕易今甘用父子異心之人即  
朝廷亦未免易於用人也疏入不報遂乞歸不允授  
起居郎兼中書舍人未幾擢嵩之刑部尚書公復奏  
曰臣于嵩之本無仇怨但國事所係誼難緘默嵩之  
誥命終不與書行乃出甫知江州尋改知婺州不拜  
嘉熙元年遷中書舍人入見帝問邊事甫奏當以上  
流為急和議恐誤事又奏備邊四事嵩之移京湖沿  
江制置使知鄂州甫奏曰嵩之輕脫難信去年在淮

西王檄由淮西而來北軍踵之今又併湖南付之臣  
恐其復以悞淮西者誤湖南疏留中不行翼日權吏  
部侍郎引疾至八疏賜告一月遂歸從臣復合奏留  
之屢命俱辭不拜遷兵部侍郎入見奏江潮暴湧旱  
魃為虐楮幣蝕其心腹大敵剝其四支危亡之禍近  
在旦夕乞秉一德塞邪徑遷吏部侍郎兼國子祭酒  
日召諸生課其問學時邊檄日至甫條十事至為詳  
明權兵部尚書暫兼吏部尚書致仕卒于家贈少傅



謚正肅公少服父訓知為學當師聖人以立志為先  
後問道於楊文元公告之曰學貴自得此尊公之訓  
也心明則本立矣由是慨然以斯道自任居官切于  
愛民所至有惠政立朝正色無所阿附王深寧先生  
謂近日科名有益世道者惟公一人而已所著有孝  
說孟子解後省封駁信安志江東荒政錄防拓錄樂  
事錄及蒙齋文集行于世

題陳和仲觀聚堂詩

習菴築室扁曰觀聚堂前何有萬象可睹山如郭郭烟  
雲吞吐草木沃若春光媚嫵脩篁漫山不知隆暑何況  
秋空呼日入戶朔風吹雪松聲如怒上天下地四方曰  
宇宙生其間何可勝數我于是觀樂哉斯土隨意作室  
不華不窳買山旋添稍葺園圃得趣幽閒不入城府良  
朋偶來傾倒肺腑不及時事惟談鄒魯朋去何為周易  
一部消息盈虛窮今亘古觀乃自觀寂無一語

題陳和仲尊明亭

非德不尊非道不明爰取斯義以名吾亭亭在山巔氣  
象巍然山從何來蜿蜒蜿蜒我坐亭上極目一望羣峯  
畢朝尊無與抗我撫亭下萬狀難寫一一分明入我醖  
罍有時攜筇偕二三朋莫知我心獨撫孤松

丞相魏郡鄭忠定王清之

字德源嘉定十年進士初官國子錄丞相史彌遠引  
為魏惠憲王府教授理宗立以定策功不十年位至  
宰輔歷進太傅左丞相封魏國公卒贈尚書令魏郡

王謚忠定凡四登相位端平間召用真德秀魏了翁  
崔與之袁甫諸賢數十人時稱小元祐及暮年再相  
充位而已

宋南渡後吾鄉位至執政者十八人其詩存者絕少  
固有惜其不傳者亦有幸其得不傳者今得列此卷  
僅二人樓宣獻詩以未見其全集所錄十七首鄭忠  
定詩為舊乘所載所錄五首嗟夫詩文在世其傳與  
不傳亦天也

可齋陳大卿政成之暇蒐討河渠為鄉國長久  
慮開萬世利非君侯其孰屬因效一德以廣  
盛心焉

四明瀛海壖大田沃多稼三江納行潦九穀偏畏夏治  
水宜講行時哉及閒暇方當暑如愔孰謂晴可乍十雨  
非所憂一暴良已怕東有錢湖浸寒玉渺無價西有它  
山源盈科通晝夜唯此兩支邑厥田俱下下問之何因  
爾水道無所舍河伯空望洋旱魃巧乘罅緬思井田規

畎澮分潑汙培浚倘高深怒潮敢雄跨官但督賦興誰  
肯趨田駕六輔能即功百泉豈難壩願言均此施利澤  
侔造化盡復淮南坡端可儕杜亞

再用韻

孔明本躬耕樊遲請學稼力田乃有秋暑雨敢咨夏聖  
賢本憂民孔墨不遑暇因思比歲饑可謂越俗乍豈惟  
農夫驚亦使達官怕倉無矯制發米湧在東價若然望  
豐年譬彼求時夜晝壤來福星上熟壓中下二麥騰割

雲五彩紛遶舍苗根舒薤本黍荅折榴罇龍麟原鏤勝  
燕尾水分汊毳獸將西成秧馬豈虛跨飭農收奇勲省  
歛不更駕預為鄞鄉謀復廣它山壩功比昔賢倍政隨  
時雨化願刻可齋詩端與雅頌亞

湖上口占

賣葑千艘底處藏媧天濯熱卧湖光山雲既雨猶相逐  
水草無花亦自香埜徑偏穿人借問僧茶旋點客先嘗  
反思舉世趨炎者誰識蘋風五月涼

咏六和塔

經行塔下幾春秋每恨無因到上頭  
今日始知高處險不如歸卧舊林丘

題東山寺

謝公雅志在東山一入黃扉不復還  
公去我來山屬我為公償却半生閒

薛縣尉師傳

紹定五年進士官某縣尉所著有雪蓑集



六橋閒步二首

出郭青岑近臨流白鳥飛  
笙歌春雨歇草樹夕陽微  
山色邀藜杖湖風颭葛衣  
虛舟林處士不見鶴來歸

向晚西湖路烟霞淡水汀  
垂楊拂波綠芳草慢堤青  
地僻漁樵聚山深殿閣扃  
平生卜投老夢寐有南屏

薛郡判師魯

不詳

苦雪

六出夫何甚經旬散野堂喜心翻作厭瑞物恐為殃歲  
晚思新火天寒望太陽荒村風雪裏賴有隔年糧

過王處士竹莊

臨流結屋植琅玕中有高人詠考槃一曲秋烟青欲滴  
滿林春雨翠堪看山僧過乞歸雲杖漁父來分釣月竿  
千古王猷惟此癖但知此外別無歡

禮部尚書王深寧先生應麟

字伯厚與弟應鳳同日生九歲通六經父撝性嚴急

每授題設高座命先生兄弟坐堂下畫燭為期少緩  
輒怒呵之由是先生為文益敏疾年十九舉進士由  
衢州西安簿再調揚州教授先生嘗愾然謂今日業  
舉子者常以沽名既得便一切委棄制度典章漫不  
知省非國家所望於通儒也遂閉門發憤假館閣書  
盡讀之手輯玉海二百四卷遂與弟應鳳相繼舉博  
學宏詞科添差浙西安撫司幹辦開慶元年策進士  
召入為覆考檢點試卷官先生得一卷曰是卷古誼

若龜鑑忠肝如鐵石臣敢為得人賀遂定第一及唱  
名乃文天祥也稍遷太常寺主簿面對上愀然曰邊  
事甚可憂公言無事深憂臨事不懼願汲汲預防毋  
為壅蔽所欺時丞相丁大全方以會計得幸先生復  
極言邊信若此重餒必失軍民心遂出判台州初大  
全欲引先生為御史不應及大全敗一時附和者俱  
禁錮而先生迄召為太常博士擢秘書郎彗星見應  
詔極論執政侍從臺諫之罪積私財行公田之害遷

著作佐郎湯文清公漢為少卿與先生居隣墻晨夕  
講道先生論關雒濂閩江西之同異永嘉制度沙隨  
古易蔡氏圖書經緯西蜀史學通貫精微剖析幽渺  
湯公歎曰吾聞士甚多惟伯厚甫為真儒使真文忠  
在願同在弟子列會湯公耄年力引去遂薦先生于  
丞相賈似道理宗崩度宗嗣位攝禮部郎掌丞相笈  
表故事聽政御正殿丞相上四表即允一夕百官會  
臨宮中丞相命省吏致命於臨次曰嗣君入纂大統

讓禮宜加多願郎中賸多三表先生即臨次操筆吏  
拱立以俟須臾具進丞相大驚兼攝學士院侍經筵  
時丞相崑拜平章左右相葉夢鼎江萬里俱避去闕  
相數月似道遂亦數求去邀上上惴恐不知所以先  
生奏言孝宗時亦嘗闕相逾年上如先生所言慰諭  
之似道大疑上安得此語後知從經筵所授深忌之  
會冬雷先生疏言十月之雷惟東漢數見命令不崑  
奸邪並進卑踰尊外凌內之象當清天君謹天命休

天德回天心守成必法祖宗御治必總威福已又直  
前奏事謂用人當先察君子小人似道積怒使臺臣  
駁之出知徽州先生父撫嘗知是郡其父老俱曰此  
吾清白太守子也先生治郡摧豪右省租賦一年大  
治會掌制乏人衆論合推先生似道亦曰固非伯厚  
不可召為秘書監仍兼中書舍人又極言邊事似道  
更謀逐之會以憂去似道敗復起兼直學士屢疏國  
家大計日食言荅天戒五事陳備禦十策俱不及用

時國事日壞史院無人凡封拜將相偏行諸房詞命  
皆出先生手從容應當忠義之心溢于言表轉禮部  
尚書給事中階鄞縣開國伯丞相留夢炎用徐裳為  
御史黃萬石除江西朱禩孫禩江陵夢炎猶除拜二  
帥不止先生徽奏論裳為夢炎同鄉有私人之嫌萬  
石等誤國罪大夢炎舛令愎諫今日賣除者多其任  
用之人疏入不報即引歸家居凡二十年自號深寧  
老人及宋亡益杜門不出所著述只書甲子晚歲自



為誌銘有曰其仕其止如倨如圖卒年七十四所著  
深寧集一百卷玉堂類藁十三卷掖垣類藁二十二  
卷詩考五卷詩地理考五卷漢藝文誌考證十卷通  
鑑地理考一百卷通鑑地理通釋十六卷通鑑答問  
四卷困學紀聞二十卷蒙訓七十卷集解踐祚篇補  
注急就篇六卷補註王會篇小學紺珠十卷玉海二  
百四卷詞學指南四卷詞學題苑四十卷筆海四十  
卷姓氏篇六卷漢制考四卷六經天文篇六卷小學

諷詠四卷

先輩言古今撰述之盛前無如葛稚川所著書六百餘卷其次即先生所著六百八十九卷亦極盛矣先生歿後其書刊布者玉海因學紀聞詩考詩地理考漢藝文志考通鑑地理通釋諸書共十五種惟玉海盛行于世先生少從鄉先輩王埜受學得真西山先生之傳源緒精密故其玉海跋語曰余幼好奇耕獵詞圃麗澤西山詒我萬撫北山之鈔西齋之目披華

啓秀歷歷載腹竊吹六經叨榮兩制汗顏前脩皓首  
曲藝斲輪不傳屠龍無用緘之青箱以詔洛誦觀先  
生所自述可見矣

挽袁進士鏞詩

天柱不可折柱折勢莫撐九鼎不可覆鼎覆人莫扛袁  
公烈丈夫獨立東南方欲以一已力代國相頡頏適遭  
宋祚移恥為不義戕奮然抱志起誓欲掃欃槍拔劍突  
前麾手回日月光賊勢愈猖獗山摧失忠良嗚呼絕倫

志不得騁才長妻孥悉從溺枯骨誰為襄忠烈動天地  
游魂為國殤山水倍堪悲抱恨徹穹蒼穹蒼幸一息庶  
幾紀星霜西風白楊路哀猿號崇岡解劍挂墓柏泣下  
沾衣裳惜哉時不利抽毫述悲傷

薛知縣琦

所著有自笑編

題荆浩畫青山白雲卷

渺渺山上山隱隱樹邊樹  
鷄犬不聞聲居人在何處  
扁

舟載酒來相尋古木蒼苔一徑深白雲不飛青山舞誰  
悟荆生點筆心

舟泊五聖祠前

葉落古祠前村安許宿船人聲齊到客月色獨歸禪野  
火明秋渚山鐘出寺烟推篷不成寐霜氣覽江天

史唐卿

與兄蒙卿同中咸淳元年進士

鳳鳴洞

何年雷斧鑿山裂六月蒼崖瀉飛雪孤鳳一聲去不聞  
海水桑田幾興滅我知仙去仙當存時見真形坐岩穴  
青天半夜玉簫寒喚醒幽人弄明月

楊再十一君

失其名氏吾鄞名族前有史鄭樓豐後有楊陸張屠  
君即楊氏之始祖也少有詩名至德祐以後自以世  
為宋臣遂高隱不出作咏史詩以自見子孫守其訓  
俱以傳經世其家所稱鏡川之楊執義不仕者也後

七世而為文懿公兄弟始大顯于世

書感

楓江渡口草萋萋  
桃浦橋邊夕照低  
惟有舊家雙燕子  
年年飛繞綠楊隄

潦倒江南一布衣  
家貧歲晚寸心違  
不堪倚杖楓江路  
手種青松大十圍



甬上耆舊詩卷二